

Հաստատված է՝
ՀՀ փաստաբանների պալատի
նախագահի 19.09.2016թ. թիվ 405-Լ
որոշմամբ

Արա Ջոհրաբյան՝

Հ Ր Ա Հ Ա Ն Գ

ՀԱՆՐԱՅԻՆ ՊԱՇՏՊԱՆԻ ՄԱՍՆԱԳԻՏԱԿԱՆ ՊԱՏՐԱՍՏՎԱԾՈՒԹՅԱՆ ԵՎ ԱՇԽԱՏԱՆՔԻ ԱՐԴՅՈՒՆԱՎԵՏՈՒԹՅԱՆ ԳՆԱՀԱՏՄԱՆ ՄԱՍԻՆ

ՆՈՐ ԽՄԲԱԳՐՈՒԹՅԱՄԲ

I. ԸՆԴՀԱՆՈՒՐ ԴՐՈՒՅԹՆԵՐ

1. Սույն հրահանգը սահմանում է Հայաստանի Հանրապետության փաստաբանների պալատի (**այսուհետ՝ ՀՀ փաստաբանների պալատ**) հանրային պաշտպանի գրասենյակում (**այսուհետ՝ նաև ՀՊԳ**) առանց մրցույթի անցկացման հանրային պաշտպանի հետ կնքված աշխատանքային պայմանագրի մեկամյա ժամկետը ևս մեկ տարով երկարաձգելու համար հանրային պաշտպանի մասնագիտական պատրաստվածության և աշխատանքի արդյունավետության գնահատման (**այսուհետ՝ աշխատանքի արդյունավետության գնահատման**) չափորոշիչները, գնահատման ընթացակարգը և գնահատման հանձնաժողովի՝ ի պաշտոնե կազմը:

II. ԳՆԱՀԱՏՄԱՆ ՉԱՓՈՐՈՇԻՉՆԵՐԸ

2. Հանրային պաշտպանի աշխատանքի արդյունավետության գնահատման համար հաշվետու ժամանակահատվածի կտրվածքով հաշվի են առնվում հետևյալ երեք խումբ չափորոշիչները՝

1) ընդհանուր չափորոշիչներ.

2) վարույթն իրականացնող մարմինների նախաձեռնությամբ նշանակված հանրային պաշտպանների աշխատանքի արդյունավետության գնահատման չափորոշիչներ.

3) քաղաքացիների դիմումների հիման վրա նշանակված հանրային պաշտպանների աշխատանքի արդյունավետության գնահատման չափորոշիչներ:

3. Սույն հրահանգի 2-րդ կետում նշված չափորոշիչները սահմանված են սույն հրահանգի համապատասխանաբար հավելված 1-ում, հավելված

2-ում և հավելված 3-ում (**այսուհետ՝ Հավելվածներ**):¹

III. ԳՆԱՀԱՏՄԱՆ ՆԱԽԱՊԱՏՐԱՍՏՈՒՄԸ

4. Գնահատման գործընթացը կազմակերպում է սույն հրահանգի V-րդ գլխով նախատեսված գնահատման հանձնաժողովը (**այսուհետ՝ Գնահատման հանձնաժողով**):

5. Հանրային պաշտպանի գրասենյակի ղեկավարը կամ ղեկավարի տեղակալը ոչ ուշ քան մինչև **ընթացիկ տարվա նոյեմբերի 5-ը** Գնահատման հանձնաժողովի նախագահին է ներկայացում յուրաքանչյուր հանրային պաշտպանի կողմից հաշվետու տարվա ընթացքում (**հունվարի 1-ից առ նոյեմբերի 1-ը**) կատարված աշխատանքի, ինչպես նաև Հավելված 2-ի և Հավելված 3-ի համապատասխան՝ այդ աշխատանքի նախնական գնահատման վերաբերյալ ամփոփաթերթեր (**այսուհետ՝ նաև Ամփոփաթերթեր**):

6. Ամփոփաթերթերը կազմվում են հանրային պաշտպանների կողմից «Հանրային պաշտպանի գրասենյակ» էլեկտրոնային ծրագրում (այսուհետ՝ էլեկտրոնային ծրագիր) մուտքագրված տվյալների հիման վրա: Մուտքագրված տվյալների հավաստիությունը ստուգելու, ինչպես նաև տեխնիկական և մուտքագրման ժամանակ թույլ տրված մեխանիկական սխալները բացառելու նպատակով Ամփոփաթերթերը, նախքան Գնահատման հանձնաժողովին ներկայացնելը, հնարավորության դեպքում, ներկայացվում են (առձեռն, փոստով կամ էլեկտրոնային փոստով) հանրային պաշտպաններին:

7. Հանրային պաշտպանն, ստանալով Ամփոփաթերթը, պարտավոր է ստանալու պահից երկու աշխատանքային օրվա ընթացքում գրավոր ներկայացնել (առձեռն, փոստով կամ էլեկտրոնային փոստով) իր առաջարկությունը, եթե համաձայն չէ ներկայացված տվյալների հետ: Հանրային պաշտպանն առաջարկությանը կից պետք է ներկայացնի համապատասխան հիմնավորող փաստաթղթեր: Հանրային պաշտպանի կողմից սահմանված ժամկետում ստացված առաջարկության հիման վրա Հանրային պաշտպանի գրասենյակի ղեկավարը կամ ղեկավարի տեղակալը ամփոփաթերթում կատարում է փոփոխություն կամ գրավոր մերժում է հանրային պաշտպանի առաջարկությունը: Հանրային պաշտպանի առաջարկությունները և/կամ մերժման դիրքորոշումները կցվում են հանրային պաշտպանների վերաբերյալ կազմված ամփոփաթերթերին:

8. Մինչև նոյեմբերի 5-ը Գնահատման հանձնաժողովի նախագահը՝

1) ՀՀ փաստաբանների պալատի վերապատրաստման հարցերով և

¹ Վերաքննիչ և (կամ) վճռաբեկ դատարաններում այլ հանրային պաշտպանի բողոքի հիման վրա ներկայացուցչություն իրականացանող հանրային պաշտպանին տրամադրվում է հավելված 2-ով և հավելված 3-ով սահմանված միավորի մեկ երկրորդ չափով միավոր, իսկ տվյալ վերաքննիչ կամ վճռաբեկ բողոքը կազմած հանրային պաշտպանին տրվում է նշված հավելվածներով սահմանված միավորը: Նշված միավորները ամփոփվում են ըստ «Հանրային պաշտպանի գրասենյակ» էլեկտրոնային ծրագրի՝ հատուկ սյունակներում արդյունքներ և դրանց տրվող միավորներ հաշվարկելով:

կարգապահական գործերի համակարգողներից ստանում է համապատասխանաբար՝ հանրային պաշտպանների կողմից ընթացիկ տարում վերապատրաստում անցած լինելու մասին և հանրային պաշտպաններին ՀՀ փաստաբանների պալատի խորհրդի կողմից կարգապահական տույժի ենթարկած լինելու մասին տեղեկություններ.

2) ՀՀ փաստաբանների պալատի հանրային պաշտպանի գրասենյակի մոնիթորինգի պատասխանատուներից ստանում է հանրային պաշտպանների կողմից Հանրային պաշտպանի գրասենյակի կանոնակարգով նախատեսված փաստաբանական վարույթներին վերաբերվող, ինչպես նաև Հանրային պաշտպանի գրասենյակի կողմից անվճար իրավաբանական օգնություն տրամադրելու վերաբերյալ դիմումների կատարման ընթացքը կազմակերպելու մասին կարգի պահանջների խախտումների վերաբերյալ տեղեկանքները (ակտերը), ինչպես նաև էլեկտրոնային ծրագրում մուտքագրված տվյալների և փաստացի ստուգման արդյունքում հայտնաբերված տվյալների անհամապատասխանության վերաբերյալ տեղեկանքները (ակտերը):

9. Գնահատման հանձնաժողովը, հաշվի առնելով Հանրային պաշտպանի գրասենյակի ղեկավարի կամ ղեկավարի տեղակալի ներկայացրած տեղեկություններն առկա թափուր հաստիքների քանակի, «Հանրային պաշտպանի աշխատանքի անցնելու նպատակով մրցույթի անցկացման կարգ»-ի (**այսուհետ՝ Կարգ**) 1.4. կետում նախատեսված թեկնածուությունների ցուցակում հանրային պաշտպանի թեկնածուների քանակի, մարզերի դեպքում՝ նաև տվյալ տարածքը հանրային պաշտպանով ապահովելու և այլ հանգամանքները, **սահմանում է հանրային պաշտպանների**, բացառությամբ կես կամ մեկ քառորդ հաստիքներ զբաղեցնող հանրային պաշտպանների, **այն թիվը (քանակը կամ տոկոսը, այսուհետ՝ Անցողիկ թիվ)**, որոնց հետ առանց մրցույթի անցկացման՝ կնքված աշխատանքային պայմանագրի մեկամյա ժամկետը կարող է երկարաձգվել ևս մեկ տարով: Ընդ որում, նշված թիվը չի կարող պակաս լինել **Կարգի** 5.4. կետով նախատեսված՝ հանրային պաշտպանների ընդհանուր թվի առնվազն 30 (երեսուն) տոկոսից: Անցողիկ թիվը սահմանվում է սույն հրահանգի 15-րդ կետում նշված յուրաքանչյուր ցանկի համար: Գնահատման հանձնաժողովի նախագահը սույն կետում նշված գնահատման հանձնաժողովի որոշումը ներկայացնում է ՀՀ փաստաբանների պալատի նախագահին: ՀՀ փաստաբանների պալատի նախագահի կողմից երկու աշխատանքային օրվա ընթացքում, գնահատման հանձնաժողովի սահմանած Անցողիկ թիվը չփոփոխելու դեպքում, այն համարվում է ուժի մեջ մտած:

Սույն կետի առաջին պարբերությամբ նշված՝ կես կամ մեկ քառորդ հաստիքներ զբաղեցնող հանրային պաշտպանների հետ պայմանագրեր երկարաձգելու հարցը լուծվում է սույն հրահանգի 13.3 կետով սահմանված կարգով:

IV. ԳՆԱՀԱՏՄԱՆ ԿԱՐԳԸ

10. Գնահատման հանձնաժողովը գնահատումն իրականացնում և գնահատման արդյունքները ՀՀ փաստաբանների պալատի նախագահին է ներկայացնում **մինչև ընթացիկ տարվա նոյեմբերի 10-ը՝** Կարգով նախատեսված մրցույթները կազմակերպելու համար:

11. Գնահատման հանձնաժողովը գնահատումն իրականացնում է նիստերի միջոցով: Գնահատման հանձնաժողովի նիստն իրավազոր է, եթե նիստին մասնակցում է գնահատման հանձնաժողովի առնվազն չորս անդամ:

12. Գնահատման հանձնաժողովը յուրաքանչյուր հանրային պաշտպանի մասով գնահատումն իրականացնում է առանձին: Անհրաժեշտության դեպքում գնահատման հանձնաժողովը կարող է գնահատման ժամանակ նիստին հրավիրել գնահատվող հանրային պաշտպանին: Գնահատմանը հրավիրված հանրային պաշտպանի չներկայանալը արգելք չէ գնահատման հանձնաժողովի կողմից գնահատումը հանրային պաշտպանի բացակայությամբ իրականացնելու համար:

13. Յուրաքանչյուր հանրային պաշտպանի աշխատանքի արդյունավետությունը գնահատվում է հետևյալ հիմնական բանաձևով՝

13.1. Երևան քաղաքում քրեական մասնագիտացմամբ հանրային պաշտպանների համար՝

$$\text{ՀՊ ԸՄ}^2 = (\text{ՎՆ} + \text{ՔԴ} + \text{ԼՄ}^3) - \text{ԸԶ}$$

որտեղ՝

ա) **ՎՆ**-ն (վարույթն իրականացնող մարմինների նախաձեռնությամբ նշանակված հանրային պաշտպանների աշխատանքի արդյունավետության գնահատման չափորոշիչներ) հավելված 2-ում նշված միավորների հանրագումարն է.

բ) **ՔԴ**-ն (քաղաքացիների դիմումների հիման վրա նշանակված հանրային պաշտպանների աշխատանքի արդյունավետության գնահատման չափորոշիչներ) հավելված 3-ում նշված միավորների հանրագումարն է.

գ) **ԼՄ**-ն (լրացուցիչ միավորներ) հանրային պաշտպանին Գնահատման հանձնաժողովի կողմից տրվող լրացուցիչ միավորներ են՝ ՎՆ-ի և ՔԴ-ի հանրագումարի մինչև 30 (երեսուն) տոկոսի չափով:

ԼՄ-ն կարող է տրամադրվել Հանրային պաշտպանի գրասենյակի ղեկավարի առաջարկով, հաշվի առնելով առանձին գործերի բարդությունն ու ծավալը, հանրային պաշտպանի կողմից դրսևորված առանձնակի ջանասիրությունը, արձանագրված արդյունքներով հանրային պաշտպանի կողմից կազմված դատավարական և այլ փաստաթղթերի և կատարված գործողությունների որակն ու բարդությունը, ինչպես նաև այլ հանգամանքներ:

Սույն ենթակետում նշված առաջարկը Հանրային պաշտպանի

² հանրային պաշտպանին տրվող ընդհանուր միավորը

³ առկայության դեպքում

գրասենյակի ղեկավարը ներկայացնում է գրավոր՝ նշելով տվյալներ կոնկրետ գործով հանրային պաշտպանի կատարած աշխատանքի վերաբերյալ և կցելով համապատասխան դատավարական և այլ փաստաթղթերի պատճեններն ու այլ հիմնավորող փաստաթղթեր:

դ) **ԸԶ**-ն (*ընդհանուր չափորոշիչները*) հավելված 1-ում նշված նվազեցվող միավորների հանրագումարն է:

Ըստ այդմ՝ ոչ լրիվ ժամանակահատվածով (օրինակ՝ տաս ամիսներից պակաս) աշխատած հանրային պաշտպանի դեպքում՝ մեկ հանրային պաշտպանի կատարած աշխատանքը (**ՎՆ+ՔԴ**) բաժանվում է փաստացի աշխատած ժամանակահատվածի ամիսների ընդհանուր քանակին և բազմապատկվում գնահատվող ժամանակահատվածի ամիսների թվով (օրինակ՝ տասի):

13.2. Երևան քաղաքում քաղաքացիական մասնագիտացմամբ հանրային պաշտպանների համար՝

ՀՊ ԸՄ = (ՔԴ+ԼՄ)-ԸԶ

որտեղ՝

ա) **ՔԴ**-ն (*քաղաքացիների դիմումների հիման վրա նշանակված հանրային պաշտպանների աշխատանքի արդյունավետության գնահատման չափորոշիչներ*) հավելված 3-ում նշված միավորների հանրագումարն է՝ հաշված հաշվետու տարվա հունվարի 1-ից հետո ստացված գործերից.

բ) **ԼՄ**-ն (*լրացուցիչ միավորներ*) հանրային պաշտպանին Գնահատման հանձնաժողովի կողմից տրվող լրացուցիչ միավորներ (գործակիցներ) են՝ ՔԴ-ի հանրագումարի մինչև 30 (երեսուն) տոկոսի չափով (ըստ 13.1 կետի «գ» ենթակետի):

գ) **ԸԶ**-ն (*ընդհանուր չափորոշիչները*) հավելված 1-ում նշված նվազեցվող միավորների հանրագումարն է.

Ըստ այդմ՝ ոչ լրիվ ժամանակահատվածով (օրինակ՝ տաս ամիսներից պակաս) աշխատած հանրային պաշտպանի դեպքում՝ մեկ հանրային պաշտպանի կատարած աշխատանքը (**ՔԴ**) բաժանվում է փաստացի աշխատած ժամանակահատվածի ամիսների ընդհանուր քանակին և բազմապատկվում գնահատվող ժամանակահատվածի ամիսների թվով (օրինակ՝ տասի):

13.3. Մարզում հանրային պաշտպանների համար՝

ՀՊ ԸՄ = (ՎՆ+ՔԴ+ԼՄ)-ԸԶ

որտեղ՝

ա) **ՎՆ**-ն (*վարույթ իրականացնող մարմինների նախաձեռնությամբ նշանակված հանրային պաշտպանների աշխատանքի արդյունավետության գնահատման չափորոշիչներ*) հավելված 2-ում նշված միավորների

հանրագումարն է.

բ) **ՔԴ**-ն (քաղաքացիների դիմումների հիման վրա նշանակված հանրային պաշտպանների աշխատանքի արդյունավետության գնահատման չափորոշիչներ) հավելված 3-ում նշված միավորների հանրագումարն է.

գ) **ԼՄ**-ն (լրացուցիչ միավորներ) հանրային պաշտպանին գնահատման հանձնաժողովի կողմից տրվող լրացուցիչ միավորներ (գործակիցներ) են՝ ՎՆ-ի և ՔԴ-ի հանրագումարի մինչև 30 (երեսուն) տոկոսի չափով (ըստ 13.1 կետի «գ» ենթակետի):

դ) **ԸԶ**-ն (ընդհանուր չափորոշիչները) հավելված 1-ում նշված նվազեցվող միավորների հանրագումարն է.

Ըստ այդմ՝ ոչ լրիվ ժամանակահատվածով (օրինակ՝ տաս ամիսներից պակաս) աշխատած հանրային պաշտպանի դեպքում՝ մեկ հանրային պաշտպանի կատարած աշխատանքը (**ՎՆ+ՔԴ**) բաժանվում է փաստացի աշխատած ժամանակահատվածի ամիսների ընդհանուր քանակին և բազմապատկվում գնահատվող ժամանակահատվածի ամիսների թվով (օրինակ՝ տասի):

Մարզում կես կամ մեկ քառորդ հաստիքի զբաղեցնող հանրային պաշտպանի կատարած աշխատանքի գնահատում չի կատարվում և վերջինիս հետ կնքված աշխատանքային պայմանագրի մեկամյա ժամկետը երկարաձգելու հարցը (Անցողիկ միավորներ տրամադրելու) լուծում է Գնահատման հանձնաժողովը՝ հաշվի առնելով Հանրային պաշտպանի գրասենյակի ղեկավարի առաջարկը և սույն հրահանգի 9-րդ կետով սահմանված հանգամանքները:

14. Հանրային պաշտպանի աշխատանքի գնահատումն ամփոփվում է համաձայն **Հավելված 4-ի**:

15. Գնահատման արդյունքներով, ըստ հանրային պաշտպանների աշխատանքների գնահատման վարկանիշային միավորների⁴, կազմվում են հետևյալ ցանկերը.

1) Երևան քաղաքի քրեական ուղղվածության հանրային պաշտպանների աշխատանքների արդյունավետության գնահատման ցանկ.

2) Երևան քաղաքի քաղաքացիական ուղղվածության հանրային պաշտպանների աշխատանքների արդյունավետության գնահատման ցանկ,

3) ըստ յուրաքանչյուր մարզի հանրային պաշտպանների աշխատանքների արդյունավետության գնահատման ցանկ (մասնագիտացումների դեպքում՝ նաև ըստ մասնագիտացումների):

16. Հանրային պաշտպանը, որը հաշվետու ժամանակահատվածում աշխատել է ոչ ավել, քան չորս ամիս, մեխանիկորեն համարվում է Անցողիկ միավոր ստացած, եթե նա այդ ժամանակահատվածում չի խախտել Հավելված 1-ի 2-րդ և 3-րդ կետերով նախատեսված պահանջները: Հավելված 1-ի 2-րդ և 3-րդ կետերով նախատեսված պահանջները խախտելու դեպքում հանրային պաշտպանը մասնակցում է հանրային պաշտպանի թեկնածուների համար անցկացվող մրցույթին ընդհանուր

⁴ Գնահատման ցանկերում հանրային պաշտպանների թվարկումն իրականացվում է ըստ ստացած միավորների՝ առավելագույնից նվազագույն:

հիմունքերով:

17. Ցանկերից յուրաքանչյուրից Անցողիկ թվին համապատասխանող հանրային պաշտպանների վերաբերյալ տվյալներն ընդգրկվում են մեկ միասնական ցանկում (ազգանունների այբբենական կարգով)՝ կազմելով առանց մրցույթի անցկացման հանրային պաշտպանի հետ կնքված աշխատանքային պայմանագրի մեկամյա ժամկետը ևս մեկ տարով երկարաձգելու համար հանրային պաշտպանների միասնական ցանկը: Միասնական ցանկը հաստատելու մասին գնահատման հանձնաժողովը կայացնում է որոշում:

18. Գնահատման հանձնաժողովը միասնական ցանկը հաստատելուց հետո երկու օրվա ընթացքում՝

1) յուրաքանչյուր հանրային պաշտպանի տեղեկացնում է իր՝ ա) գնահատման արդյունքների և բ) միասնական ցանկում ընդգրկված լինելու կամ ընդգրկված չլինելու մասին.

2) ցանկը ներկայացնում է ՀՀ փաստաբանների պալատի նախագահին՝ Անցողիկ թվին համապատասխանող հանրային պաշտպանների հետ աշխատանքային պայմանագրերը 1 (մեկ) տարով երկարաձգելու նպատակով:

V. ԳՆԱՀԱՏՄԱՆ ՀԱՆՁՆԱԺՈՂՈՎԻ ԿԱԶՄԸ ԵՎ ՈՐՈՇՈՒՄՆԵՐԻ ԲՈՂՈՔԱՐԿՄԱՆ ԿԱՐԳԸ

19. Գնահատման հանձնաժողովը կազմված է 7 (յոթ) անդամներից՝ հանձնաժողովի նախագահից և հանձնաժողովի 6 (վեց) անդամներից:

20. Գնահատման հանձնաժողովի ի պաշտոնե կազմն է՝

Հանձնաժողովի նախագահ՝

1) ՀՀ փաստաբանների պալատի նախագահի տեղակալը՝

Գնահատման հանձնաժողովի անդամներ՝

2) ՀՀ փաստաբանների պալատի ընդհանուր դեպարտամենտի ղեկավարը,

3) Հանրային պաշտպանի գրասենյակի ղեկավարը,

4) Հանրային պաշտպանի գրասենյակի ղեկավարի տեղակալը,

5) ՀՀ փաստաբանների պալատի նախագահի խորհրդական:

(կեփը փոփոխվել է 30.10.2019թ. թիվ 461-L որոշմամբ)

21. Գնահատման հանձնաժողովի՝ փաստաբանների կազմից **երկու փաստաբան անդամներին** (վերջիններիս համաձայնությամբ) նշանակում է ՀՀ փաստաբանների պալատի նախագահը:

22. Գնահատման հանձնաժողովի նիստերն արձանագրում և փաստաթղթերի նախագծերը կազմում է Հանրային պաշտպանի գրասենյակի ղեկավարի տեղակալը:

23. Գնահատման հանձնաժողովի գործողությունները (անգործությունը) կամ որոշումները կարող են բողոքարկվել հանրային պաշտպանների կողմից՝ ՀՀ փաստաբանների պալատի նախագահին՝ գործողության (անգործության) կամ որոշման մասին տեղյակ լինելու պահից երեք օրվա ընթացքում:

24. Գնահատման հանձնաժողովի գործողությունների (անգործության) կամ որոշումների դեմ բերված բողոքները քննության է առնում հինգօրյա ժամկետում և կայացնում է պատճառաբանված որոշում:

25. Գնահատման հանձնաժողովը կարող է հանրային պաշտպանին տալ սույն հրահանգի 13.1, 13.2 և 13.3 կետերում նշված լրացուցիչ միավորներ (ԼՄ) ՎՆ-ի և ՔԴ-ի հանրագումարի մինչև 60 (վաթսուն) տոկոսի չափով՝ հաշվի առնելով հասարակական հիմունքներով հանրային պաշտպանի ներգրավվածությունը Փաստաբանների պալատի ակումբում, հանձնաժողովում կամ աշխատանքային խմբում, եթե այդ մասնակցության մասով վերջինս ունեցել է էական ծանրաբեռնվածություն:

(կեփը լրացվել է 30.10.2019թ. թիվ 461-Լ որոշմամբ)

26. Գնահատման հանձնաժողովի նախագահը՝

1) կազմակերպում է գնահատման հանձնաժողովի աշխատանքները.

2) ստորագրում է գնահատման հանձնաժողովի փաստաթղթերը:

(կեփը լրացվել է 30.10.2019թ. թիվ 461-Լ որոշմամբ)